



**Annertuumik innarluutillit sullivinni illersugaasuni ulluuneranilu
suliassaqtitsiniarfinni sulinerminni aningaasarsiarisartagaat qanoq
pitsanngorsarneqarsinnaanersut pillugu apeqquteqaat aallaavigalugu oqallinnissamik
siunnersuut.**

(inatsisartuni ilaasortaq, Martha Lund Olsen, Siumut).

Inatsisartunut ilaasortap, Martha Lund Olsen, Siumut annertuumik innarluutillit sullivinni illersugaasuni ulluuneranilu suliassaqtitsiniarfinni sulinerminni aningaasarsiarisartagaat qanoq pitsanngorsarneqarsinnaanersut pillugu apeqquteqaat aallaavigalugu oqallinnissamik siunnersuutaa Partii Naleraq sinnerlugu imannak oqaaseqarfigissuarput:

Aallaqqaasiullugu ilisimatitsissutigissuara; annertuumik innarluutillit sulinermi akissarsiaasa nalunaaquttap akunneranut 15 kr-inik annertussuseqartut qaffanneqarnissaat pillugu Naalackersuisut piaartumik suliniuteqaqqullugit Inatsisartut upernaag mannamut ataatsimiinnissatsinnut aaliangiiffigisassaattut siunnersuuteqaraluarpunga, kisianni iluatsinngitsumik.

Aamma tammanna sioqqullugu inuit annertuumik innarluutillit sannavimmi suliffeqarfimmiluunniit immikkut illersukkami sulinerminni akissarsiaat pillugit Naalackersuisuisunut § 37-ikut apeqquteqarnikuuvunga.

Tassunga apeqqummut nr. 199/2016-imut taamanikkut isumaginninnermut naalackersuisoq Martha Lund Olsen ilaatigut imannak akissuteqarpoq:

“Annertuumik innarluutillit ikiorserneqartarnerat pillugu Inatsisartut peqqussutaanni nr. 7, 3. November 1994-imeersumi kapitali 6-imi § 18, imm. 2 malillugu innuttaasunik annertuumik innarluutilinnik suliassaqtitsineq pillugu malittarisassanik Naalackersuisut aalajangersaasinnaapput, taakkununga ilanngullugit suliassaqtitsinermut atatillugu innuttaasut innarluutilinnut akissarsiaqtitsisinnaaneq pillugu malittarisassat”.

Tassa Naalackersuisut qulaani peqqussut naapertorlugu pisinnaatitaareerput annertuumik innarluutillit sulisinnaasortaasa sulinerminni akissarsiarisartagaat pillugit

aaliangersaasinnaallutik aamma inatsisartunut ilaasortap Martha Lund Olsen-ip Naalakkersuisuuneratali nalaani.

Tassami maannamut annertuumik innarluutilinnut akissarsiaritinneqartoq 1994-imili tiimimut 15,00 kr-inut annertussusilerneqarsimavoq, tassa ukiut 27-it matuma siornali, naak akissarsiat akillut allat tamarmik taamanikkorniit arlaleriarlutik qaffanneqartaraluartut, taamaattoq annertuumik innarluutillit isiginiarneqarsimangillat.

Taamaammat isumaqarpugut Naalakkersuisut piaarnerpaamik qulaani peqqussutikkut pisinnaatitaanertik naapertorlugu annertuumik innarluutillit akissarsiarisartagaat iluarsiivigissagaat, akit qaffakkiartortartarnerannut naapertuuttumik iluarsineqartartunngorlugit.

Tassami inunnuk annertuumik innarluutilinnut qimmaallannarpoq ineriartuutaallunilu, suliffinni imikkut ittumik aaqqissuussinikkut suleqataasinnaanermik akuerineqartarneq.

Periarfissat taamaattut inunnuk annertuumik innarluutilinnut atuutsinneqarnerat ajunngilluinnarpoq, taakkununga qimmassaataallunilu inerikkiartuutaammat tapersertariaqarpoq.

Tassami inuit taakku innarluuteqaraluartut allanullu sanilliullugit piginnaasaat killeqarsinnaangaluartut, eqqaamasariaqarpoq inuit taakku allatuulli naleqassuseqarlutillu pisinnaatitaaffeqarmata tamatta ataqqisariaqakkatsinnik.

Uggornarpoq inuit taakku tiimimusiaat taamaallaat 15 kr-inut aaliangiunneqarsimammat, allanullu sanilliullugu tiimimusiaq taanna akit qaffakkiartornerat malillugu qaffanneqarsinnaatitaanngimmat, naak allat tamarmik akissarsiaat akit qaffakkiartornerat malillugu iluarsiivigineqartaraluartut.

Taamaammat Partii Naleqqamiit piumasaraarput inuit pineqartut tiimimusiaat qaffanneqassasoq aammalu nioqqutissat akiisa akissarsiallu naliginnaasumik qaffanneqartarnerannut malinnaasunngorlugu iluarsineqartassasut.

Taama naatsumik oqaaseqarluta oqallisissiatut siunnersuut oqaaseqarfigilaarparput.

Anthon Frederiksen